

漢西域圖考

漢西域圖考卷之三

番禺李光廷恢垣撰

天山以北諸國沿革考

前後蒲類車師後城長郁立師四國

今巴里坤

蒲類四國今巴里坤地東南接哈密西北接烏魯木齊

今奇臺巡檢駐古城則與烏魯木齊分界地也自奇臺

而東三十里入山五百六十里至肋巴泉塘山勢始開

又東二百六十里而復合山環如城中爲巨泊今名巴

爾庫爾

急讀卽巴里坤

淖爾古之蒲類海也山內之地爲漢蒲

類國東漢時蒲類遷於阿惡又爲移支國治焉東界匈奴常爲戰地宣帝本始二年五將軍征匈奴蒲類將軍約烏孫合擊匈奴蒲類澤不相及而罷東漢明帝永平十六年竇固破匈奴呼衍王於天山追至蒲類海班超將兵別擊伊吾戰於蒲類海和帝永元三年單于衰弱至蒲類海款塞桓帝元嘉元年伊吾司馬毛愷之遣吏於蒲類海與呼衍王戰悉爲所沒敦煌太守馬達出塞至蒲類海呼衍王引去地迫而險爲匈奴所必爭張璠疏所云呼衍王常展轉蒲類秦海之間者也其南山卽

天山亦曰白山

西河舊事云天山最高
冬夏常雪故曰白山

後名時羅漫山

前書武帝紀天漢二年李廣利擊匈奴右賢王於天山
征和三年遣馬通等分道出酒泉至天山此天山也後
書永平十七年竇固與耿秉擊白山降車師亦卽此山
隋書突厥傳射匱可汗攻處羅可汗處羅走高昌東保
時羅漫山唐書地理志天山在伊州北一名白山胡名
析羅漫山析羅卽時羅之轉此則天山白山同爲一山
之証也
宋樂史太平寰宇記云伊州東北至時羅漫山二

百四十里北有大川入回鶻界伊州西北至時羅漫山
百四十六里山北有大磧入金山哥羅祿住處蓋自烏
魯木齊之南其南支山孟克圖嶺東趨皆曰天山其自
烏可克嶺東至庫舍圖嶺卽今巴爾坤之南山也漢後

屬匈奴晉世匈奴南徙敕勒居之晉書敕勒傳有伊吾
以西焉耆以北諸部此屬其地元魏時屬蠕蠕宣武帝
永平中高車主彌俄突擊殺蠕蠕主伏圖於蒲類海卽
其地也隋時屬突厥後分爲西突厥唐世爲沙陀部與
處月雜居唐書沙陀傳云處月居金娑山之陽蒲類之
東有大磧名沙陀故號沙陀突厥者是已賀魯之反沙
陀朱邪孤注據牢山以叛爲梁建方所誅後亦漸強武
后長安二年進沙陀金山爲金滿都督先天中子輔國
嗣徙居北廷唐所建置則貞觀十四年于始昌故城置

蒲昌縣東南有蒲類海今噶順溝地開元中置伊吾軍

在伊州西北五百里今肋巴泉塘地此皆鎮西廳所轄

境也自鎮西廳西北逾山以至奇臺縣西爲古城東爲

木壘在漢爲蒲類後國

在木壘北

車師後城長國

在奇臺北

郁立

師國

在古城北

唐前沿革與鎮西同至唐則貞觀十四年置

蒲類縣卽今古城地開元中置甘露州在今木壘城東

北唐書地理志云別自羅護守捉

今土魯番哈刺和卓之正北地

西北

上乏驢嶺百二十里至赤谷又經金山口經長泉龍泉

百八十里至獨山守捉又經蒲類縣百六十里至北延

今古城至吉木
薩百八十里

又舊唐書地理志云甘露州在北廷東

南五百里而鹹泉鎮郝遮鎮特羅堡子皆在北廷之東
此皆奇臺縣所轄境也太宗貞觀中西突厥分國兩地
皆屬咄陸高宗永徽五年平賀魯置崑陵都督府地又
屬焉德宗貞元五年沙陀叛附吐蕃隨虜南徙其地遂
空懿宗咸通七年僕固俊由北廷取西州地并入高昌
屬阿薩蘭回鶻後唐莊宗同光二年遼逾流沙取浮屠
城始通西域宋眞宗咸平六年

遼聖宗統和二十一年

遼脩可敦

城景德元年

遼統和二十二年

遼以可敦城爲鎮州軍地入於

遼徽宗宣和四年耶律大石自雲中西走可敦城至北
廷是可敦城在北廷之東亦近木壘也南渡之後爲別
失八里東境屬亦都護而高昌種亦雜居元太祖三年
西征至獨山城空無居人命月朶失野訥移唆里迷國
六十戶居之九年再至則已繁庶遂授月朶爲達魯花
赤此卽唐設守捉之地今古城南百里之松山也後并
於畏兀以封亦都護泰定後復以宗王鎮焉明初爲瓦
拉部而巴里坤地亦有汗明史哈密傳所稱迤北汗鬼
力赤卽其酋也復有乜克力小列禿兩部號北山種皆

役屬瓦拉後分四衛拉特屬和碩特部明末固始汗遷居西海此爲準噶爾台吉游牧地我朝康熙三十六年準部噶爾丹敗死割阿爾泰山以西畀策妄那布坦地爲我有康熙二十八年策妄入犯西路始屯兵焉雍正五年策妄死罷西師仍事防秋七年巴里坤始建城會噶爾丹策零入寇副將樊廷以兵二千敗之復命岳鍾琪爲甯遠大將軍出師西路屯兵巴里坤以俟釁十年岳鍾琪築木壘城後移兵回巴里坤乾隆二十年阿睦爾薩納內附命定西將軍永常由巴里坤出西路阿

逆叛永常自烏魯木齊退回木壘旋退回巴里坤二十
一年再出師兆惠由巴里坤赴援二十二年正月厄魯
特全部皆叛兆惠自伊犁轉戰而歸圖倫楚以巴里坤
兵應援回巴里坤及三月出師兆惠仍由巴里坤入伊
犁蓋新疆之定西路兵皆由此迄今則開屯興學歸諸
郡縣裁糧員設守令文物同於內地矣
巴里坤鎮西廳城雍正七年威信公岳鍾琪建高丈九
尺周八里二分四釐征準部時兩駐大軍軍罷置廳設
同知一員乾隆三十八年升爲府改城爲鎮西府城置

宜禾奇臺二縣宜禾附郭設總兵一員駐綠旗馬步兵三千六百七十八名道光中移道員駐此改府爲廳宜禾縣遂裁今惟設同知一員

會甯城在廳城東南乾隆三十七年建高一丈六尺周六里三分設領隊大臣一員滿營駐防兵九百十二名奇臺縣在廳城西北五百六十里名靖遠城乾隆三十八年建設知縣一員隸鎮西廳

古城在奇臺縣西北八十里與孚遠滿城相比古城乾隆三十五年建駐提標後營游擊一員綠旗駐防兵四

百一名設巡檢一員隸奇臺縣孚遠城乾隆三十九年
建駐領隊大臣一員滿營駐防兵一千名

木壘城雍正十年岳威信公奏建在廳城西北六百六
十里奇臺縣東百里設守備一員綠旗駐防兵三百名

車師後庭前後卑陸單桓東西且離烏貪訾離規

國八國

今烏魯木齊 附今庫爾喀喇烏蘇沿革攷

自車師後庭以西與匈奴烏孫接界者今名烏魯木齊

北阻戈壁南控陰山

自伊犁而東其南支壁曰天山其北支曰陰山

西至瑪納

斯河東至濟木薩城爲今迪化州所轄阜康昌吉綏來

三縣地漢爲車師後王庭及山北六國

卑陸單桓劫國鳥貪訾離且離

其都立師國

屬奇台縣

漢通西域後部當匈奴之衝爭之尤力宣

帝地節二年鄭吉發兵擊車師交河城破之

此今土魯番雅兒城

王尙在其北石城中

隋書高昌北有赤石山山北有貪汗山城在山中壘石爲之當卽此

城唐書地理志亦云赤石山多赤色因名在貪汗山西七十里

卽今保惠城之南山也

唐書地理志云自西州西北至交河縣又北八十里爲龍泉館其北入谷百三十里經柳谷度金娑嶺百六十

里經石會戍至北廷都護治所此與下

宋王延德記皆今交河北入保惠城路

平帝元始中徐

普欲開五船新道後王姑句不肯以衆降匈奴王莽建

國二年遣右伯甄豐出西域後王置離謀入匈奴校尉

刁護械置離送埒婁城都護但欽殺之其兄狐蘭支舉

國亡入匈奴東漢光武朝遣子入侍卻之明帝永平十

六年取伊吾地前後王皆附十八年匈奴破殺後王安

得攻金蒲城

卽車師後庭今濟木薩也

耿恭擊卻之移據疏勒城

此與

金蒲近

會帝崩車師復叛與匈奴共圍恭章帝建初元年

耿秉破交河城遣兵迎恭乃得歸和帝永元二年大將

軍竇憲破匈奴復內屬八年後王涿鞬擊前部王虜其

妻子九年遣長史王林討斬之立其弟農奇爲王安帝

永寧元年後王軍就擊殺長史索班延光四年班勇屯

柳中發兵擊獲軍就於索班歿處斬之立故王子加特
奴爲王又遣別校擊斬東且彌王更立其種人爲王順
帝永建元年勇發加特奴兵擊呼衍王破之陽嘉三年
車師司馬復發後王兵擊匈奴於闐吾谷大有斬獲四
年春呼衍王侵後部敦煌太守救之不利秋呼衍王遂
破後部桓帝永興元年後王阿羅多反候炭遮嶺餘人
叛之阿羅多走北匈奴漢立故王軍就子卑君爲王阿
羅多復還與卑君爭國詣校尉閭詳降於是立阿羅多
爲王以卑君還敦煌此皆濟木薩地也三國時東西且

離單桓卑陸蒲類

魏志注西戎傳作蒲陸

烏貪皆並於車師後部

其王治於賴城魏賜其王壹多雜守魏侍中大都尉受

魏王印見魏志注西戎傳北魏時復存且離見於北史

後六國皆爲鐵勒地亦曰高車役屬蠕蠕魏書高昌傳

云北有赤石山山北有貪汗山

貪汗山在古城西南二十里

此山北

鐵勒界也孝文帝太和十一年蠕蠕主豆崙犯塞高車

阿伏至羅與從弟窮奇諫不從率所部至前部西北自

立爲王此則正今烏魯木齊地時阿伏至羅在北窮奇

在南十四年阿伏至羅來貢旣而厭達以兵滅焉耆北

侵高車殺窮奇虜其子彌俄突阿伏至羅又殘暴國人
殺之立其宗人跋利延歲餘厭達納彌俄突國人又殺
跋利延迎彌俄突立之彌俄突旣立復入貢尋與蠕蠕
主伏圖戰於蒲類海殺伏圖明帝熙平初彌俄突爲蠕
蠕醜奴所禽部衆悉入厭達厭達聽彌俄突之弟伊匐
歸國遣使來奉表封爲高車王正光中伊匐擊敗蠕蠕
其弟越居殺之而自立東魏孝靜帝天平中伊匐子比
適又殺越居而自立興和中比適爲蠕蠕所破其子去
賓奔東魏地人蠕蠕蠕滅屬突厥隋煬帝大業四年